

漢陰廳志卷之一

通判錢鶴年重修

沿革志

志地者多先分野考唐書兩戒之說輿鬼居兩河之陽自漢中東盡華陽當地絡之東南則山南之地近於輿而遠於鉞茲地於二千里中不過數杪耳度既從同不敢泛及也惟是邑肇漢初幅幘實濶迨六朝或升爲郡且畫爲三雖當時南北啟疆各以輿圖爭盛亦由地廣衍足以容之也及石泉東徙紫陽南分而東西平行之區尚逾三舍南北寬深之徑且過四百非長才遠馭固未易如指臂使也綜其分合溯其改移志沿革

漢陰廳

國初因明舊爲縣乾隆四十七年巡撫畢諱沅奏陞興

安爲府以興安漢陰原轄地方歸併安康舊治添

設通判專司巡防五十四年總督諱勒保巡撫秦

諱承恩以幅幘遼濶知縣照料難周奏請改爲撫

民通判其在

唐虞夏爲梁州之域 禹貢華陽黑水惟梁州

按路史國名紀云三皇之時有金提國帝堯時金道華種蘭於此唐韻云周附庸金州也羅泌之說既荒怪不可信而孫愐以後周之金州釋上古之金提更爲牽強故斷自禹貢始

商屬庸國

書牧誓庸蜀羌髳孔傳庸在漢南

周屬庸國爲荊州域

周禮夏官職方氏荊州其川江漢

卷之一

沿革

二

東周時屬楚

春秋文公十六年楚人秦人巴人滅庸

七國屬秦

史記秦本紀惠王十三年取楚漢中地六百里

秦爲西城縣地

興安州志秦惠王置西城縣屬漢中郡

漢始置縣曰安陽屬漢中郡

漢書地理志漢中郡領安陽縣

太平寰宇記安陽故城在漢陰縣西二十四里敖

口東十里漢江之北

按樂史爲宋初人所云漢陰縣猶指在石泉未遷之城

東漢因之

資治通鑑張魯爲漢寧太守胡深之注引袁山松書曰建安十二年分漢中之安陽置漢寧郡

按是時改漢中郡爲漢寧郡非分安陽別置宋州郡志亦云疑前改漢中曰漢寧也

三國安陽蜀屬西城郡魏屬魏興郡

三國志魏武紀建安二十年復漢寧爲漢中郡分漢中之安陽西城爲西城郡置太守

卷之一

沿革

三

沈約宋書州郡志二漢安陽屬漢中漢末省魏復立屬魏興郡

晉改安康屬魏興郡

宋書州郡志晉武帝太康元年更名

宋爲安康郡領安康寧都

宋書州郡志安康太守宋末分魏興之安康縣及晉昌之寧都縣立治安康領寧都又云寧都處巴

漢流民者

南齊因之

梁因之

按梁書無志五代志亦不書然梁范泌太清中爲  
安康太守李遷哲傳初亦爲梁安康太守則王雄  
未定山南此地固屬梁也

西魏爲東梁州領郡三縣四安康郡領安康寧都金  
城郡領直城魏明郡領漢陽

北周書淳于誕傳孝昌三年誕以梁州安康郡阻  
帶江山要害之所置東梁州治安康

按水經酈注漢水又東歷敖頭舊立倉儲之所傍

卷之一

沿革

四

山通道水陸險湊魏興安康縣治有戍統領流雜  
漢水又東合直水水北出子午谷巖嶺下東南逕  
直城西而南流注漢漢水又東逕直城南又東逕  
千渡而至蝦蟆頤歷漢陽漁口而屆於彭谿龍竈  
矣漢水又東逕寧都縣南縣治松谿口又東逕魏  
興郡廣城縣縣治王谷又東逕魚脯谿口西城廣  
城分界於是谷

今考直水卽今池河以音近而訛也據注漢水所  
逕先歷安康縣治繼云又東合直水則昔之縣治

在池河之西與石泉西寺殘碑謂爲漢陰舊治相符蓋舊治西包石泉矣繼又云直水歷直城西而南流注漢漢水又東逕直城南是直城在今池河之東也繼又云漢水又東逕晉昌郡之寧都縣南舊志謂在今漢陰治東南亦確又宋州郡志廣城屬魏興唐地理志貞觀元年以廣德入安康疑廣德卽廣城是漢陰又南包紫陽也晉昌宋改新興魏書地形志之魏明郡卽晉昌也漢陽據酈注當在直城之東寧都之西五代志不錄

卷之一

沿革

五

後周金城郡領直城安康郡領直州又寧都縣改爲郡

雍大記東梁州周復置金城郡禹貢錐指金城城在今漢陰廳西

五代志金州安康縣蕭詧改直州

周書文帝紀大統十四年魏封宇文毓爲寧都郡公初宇文泰封寧都縣子至是改縣爲郡以封毓  
隋爲安康縣屬西城郡

五代地理志注舊曰寧都後魏置東梁州蕭詧改

直州開皇初郡廢大業初州廢縣改曰安康  
唐爲漢陰縣屬金州安康郡

舊唐書地理志武德元年以縣置西安州立寧都  
廣德二縣二年曰直州貞觀元年州廢省寧都以  
廣德入安康來屬至德二載更名漢陰縣漢陰之  
名始於此

新唐書縣西有方山關貞觀十二年置大曆六年  
省石泉來屬永貞元年復置石泉寰宇記以戶口  
散落併入也

卷之一

沿革

六

按隋以前之安康郡今廳治也唐以後之安康郡  
今府治也故六朝之官師人物封爵皆歸廳治唐  
宋以後不濫登焉

五代漢陰縣梁有後入於王蜀唐莊宗平蜀屬唐晉  
漢周皆有

宋漢陰縣屬金州安康郡

宋史地理志漢陰縣紹興二年遷治新店以舊縣  
爲鎮嘉定二年升激口鎮爲縣有饒風鎮

漢陰舊志舊治在石泉界漢江之南皇祐四年沒

於水紹興初徙治新店卽今治也

按志但云升激口爲縣而不書縣名蓋激口卽敖頭水經注謂爲安康縣治疑漢陰旣移新店石泉卽移激口而池河以西皆歸石泉矣今饒風鎮在石泉西

元省爲漢陰巡檢司

元史地理志降金州爲散州裁西城等五縣續通考平利洵陽漢陰石泉元併省入金州改爲四巡檢司

卷之一

沿革

七

明復置漢陰縣

明史藁地理志洪武時復置漢陰縣西有安陽故城北有安康故城東有廢寧都縣又北有方山關西有故激頭戍

明會典縣舊隸金州嘉靖三十八年改隸漢中府興安州志萬曆二十四年復改屬興安州

明一統志正德七年添設紫陽縣明會典本漢陰縣之東南隅正德五年割立紫陽堡六年總制洪鍾奏升爲縣蓋舊治之南又分爲紫陽矣

形勝舊志云龍 北枕鳳嶺南屏帶環月谷案列  
平原

卷之一

沿革

八